



Okončani pregovori optuženog za šverc droge i Tužilaštva BiH



Sud BiH: Odbrana očekuje da će nagodba biti razmatrana 17. avgusta

ĐORĐO TAMINDŽIJA PRISTAO NA DVIJE GODINE ZATVORA

U utorak sklapamo sporazum i tada će dovesti Tamindžiju iz zatvora u Trebinju da ga potpiše, kazao je advokat optuženog • Kupio i preprodao oko 500 grama heroína, te "zaradio" oko 4.400 eura

Đorđo Tamindžija (1965) iz Nevesinja, optužen za međunarodni šverc droge, i njegov branilac Senad Dupovac nagodili su se sa Tužilaštvom BiH te pristali da se Tamindžiji izrekne kazna od dvije godine zatvora.

"U utorak sklapamo sporazum i tada će dovesti Tamindžiju iz zatvora u Trebinju da ga potpiše. Taj sporazum će biti dostavljen Sudu BiH. Očekujemo da će 17. avgusta, pred sudijom Mirsadom Strikom, sporazum biti razmatran i tada bi trebalo da uslijedi i izricanje krivičnopravne sankcije", pojasnio nam je advokat Senad Dupovac.

Negirao krivnju

Podsjetimo, Tamindžija je krajem prošle sedmice, pred Vesnom Jesenković, sutkinjom za prethodno saslušanje Suda BiH, negirao krivnju za međunarodni šverc droge.

Njega optužnica državnog Tužilaštva tereti da je početkom aprila postao član grupe koju je organizovala njemu poznata osoba sa područja Crne Gore radi međunarodne kupoprodaje, prenosa i prevoza heroína iz Crne Gore u BiH.

"Optuženi se tereti da je, nakon



Advokat Senad Dupovac

preuzimanja heroína na području Trebinja od njemu poznatih članova grupe, vršio međunarodnu prodaju te droge", saopštili su iz Tužilaštva BiH nakon podizanja optužnice, te precizirali da je Tamindžija u više navrata kupio i preprodao ukupno oko 500 grama heroína, čime je stekao protivpravnu imovinsku korist oko 4.400 eura.

Tamindžija je uhapšen u akciji SIPA kodnog naziva Kapak, koja je početkom juna izvedena u Hercegovini, a kada su privedeni i I. B. (1958) i V. J. (1978).

Iz SIPA je tada saopćeno da su tokom pretresa i hapšenja oduzeti oko pola kilograma heroína,

ali i drugi predmeti koji mogu poslužiti kao dokaz u daljem postupku.

Nakon hapšenja, Tamindžiji je Sud BiH odredio pritvor, dok su preostale dvije osobe puštene.

Tamindžiju su, podsjećamo, pripadnici SIPA privodili i u martu prošle godine sa još osam osoba zbog organizovanog kriminala i prometa droge.

Akcija je izvedena u Mostaru, Jablanici, Nevesinju i Trebinju, nađeni su manja količina skanka, municije, novac, te više mobitela, a Tamindžija je u tom predmetu bio prvoosumnjčeni.

Istraga i presuda

Ta grupa se teretila da je od aprila 2013. švercovala marihuanu i heroin iz Crne Gore u BiH i Hrvatsku.

Svim osumnjičenim, uključujući i Tamindžiju, tada su određene mjere zabrane, a ta istraga još nije okončana.

Početkom 2008. Tamindžija je u Općinskom sudu Ljubuški osuđen na tri godine zatvora zbog nabavke i krijumčarenja pola kg heroína iz Nevesinja u Grude, a prije toga je, kako se moglo saznati, dovođen u vezu sa krađama automobila.

D. P.